

Vallais – in viadi da la Mar Mediterrana fin al Pol dal Nord

■ Il Vallais è in chantun biling (franzos e tudestg) situà en il sidvest da la Svizra. Sion furma la chapitala chantunala ed è a medem temp citad episcopala. Il Vallais furma il terz grond chantun da la Svizra (suenter il Grischun e Berna) ed è situà quasi cumpletmain en las Alps. Il territori dal Chantun consista da la Val dal Rodan e da sias valladas lateralas. En il nord giaschan las Alps Bernaisas e Vadaisas, en il sid las Alps Vallesanas. Il pli aut punct dal Chantun – ed a medem temp da l'entira Svizra – furma il Piz da Dufour (4634 m s. m.); il punct il pli bass (372 m s. m.) giascha al Lai da Geneva. Pervia dals auts culms ch'al circumdeschan, è il Vallais marcà d'in clima da steppa miaivel fin sitg che lascha per part flurir ina veggetaziun mediterranea.



Dal Pass dal Furca fin a Brig

Il Goms, la part situada sisum il Vallais, cunfinescha cun ils chantuns Berna, Uri e Tessin. Cun quels è la regiun colliada tras ils Pass dal Grimsel, Furca e Nufenen. Al Gletscher dal Rodan, che giascha al Pass dal Furca, sa chatta la funtauna dal Rodan che percurra l'entir Chantun.

A Fiesch, Betten e Mörel mainan telefericas en il territori dal Gletscher da l'Aletsch. Igl è quai il pli grond ed il pli lung gletscher da las Alps. Dapi il 2001 fa la regiun Jungfrau-Aletsch part dal Patrimoni natural mundial da l'Unesco. Il Parc natural da la Val da Binn situà en il sid da Fiesch è ritg da minerals ch'ins po chattar cun batter crappa en la chava da Lengenbach u durant ina tura cun chavacristals.

Brig, il proxim abitadi pli grond, vegn dominà dal Palaz da Stockalper. Kaspar Jodock von Stockalper (1609–1691) era daventà ritg tras l'avertura dal Pass dal Simplon e tras il commerzi da ponn e da saida. Il «grond palaz» è vegni costruì dal 1658 al 1678 directamain sper la veglia chasa Stockalper che datescha dal 1553. Il grondius complex baroc tempriv vegn dominà da trais grondas turs cun tetgs da tschagula pittorescs.

La senda da sauma sur il Simplon che Stockalper ha laschà construir en il 17avel tschientaner exista anc per gronda part. Duas chaussas han rendi enconuscent il lieu da cunfin Gondo situà en il sid dal Pass dal Simplon: las minieras d'aur ch'èn vegnidas explotadas fin il 1897 e la bova dal 2000 ch'ha devastà parts dal vitg. Il dus tunnels da la viafier tras il Simplon è vegnids costruìs ils onns 1898–1905 e 1912–1921.

Da Visp fin a Leuk

Il district da Visp cumpiglia – sco valla-

das lateralas situadas en il sid – il Saastal ed il Matteredal cun las enconuscentas destinaziuns da turissem Saas Fee e Zermatt. En la regiun da cunfin tranter questas duas valladas e l'Italia giaschan las pli autas muntognas da la Svizra (Massiv dal Monte Rosa). A Zermatt atira en pli il Matterhorn blers turists da tut il mund.

Da vart dretga da Visp sa chatta il Baltschiederl cun sias vias d'aua («Suonen»), ina particularitad vallesana che cumpara er en autras parts dal Chantun. Quests vials da lain averts èn indrizs temeraris costruìs cun grond inschign che mainan l'aua en leva pendenza vers las vischnancas.

Da Raron maina il Tunnel da basa dal Lötschberg (avert il 2007) vers Frutigen en la Part Sura Bernaisa. Il Lötschental, situà suenter Raron da la vart dretga dal Rodan, è enconuscent per ses carnaval arcaic cun sias notgs selvadias e vala en general sco lieu da retratga per la cultura alpina tradiziunala.

Sin la spunda dretga da Leuk arrivans en il lieu da cura da Leukerbad. Da là maina il Pass dal Gemmi, enconuscent per ses trutz temerari, vers la Part Sura Bernaisa.

Il Parc natural da Pfyn-Finges, situà en il sidvest da Leuk, furma quasi in hotspot da la biodiversitad al cunfin linguistic dal Vallais. Steppas e biotops, vitgs muntagnards e citadinas idillicas, vignas ed in dals guauds da tieus ils pli gronds da las Alps: en il Parc natural da Pfyn-Finges sa preschenta la natira cun ina gronda diversitad en in spazi limità e surprinda cun cuntradas variadas ed ina flora e fauna remartgaba.

Sierre, Sion e Martigny

Cun ses clima sitg, quasi mediterranean porscha la Planira dal Rodan premissas idealas per la pumicultura e la viticultura. Suandond il flum aval sa chattan en questa planira las citads da Sierre e la chapitala da Sion. En il nord da Sierre giascha l'enconuscent territori da vacanzas da Crans-Montana; en il sid è situada la Val d'Anniviers. En ina val laterala en il sid da Sion sa chatta il Lac des Dix. Cun 285 m furma el il pli aut mir da fermada da l'Europa. In'ulteriura vallada muntagnarda en il sid da Sion è la Val d'Hérens. Evolène – il lieu principal – viva d'in turissem moderà e da l'agricultura.

Martigny (num roman Octodurus) posseda restanzas d'edifizis impurtants dal temp roman. L'amfiteater è in dals paucs cumprovads en Svizra. El vala sco lieu istoric e monument cultural d'impurtanza nazionala. Ses svilup sco center da traffic ha Martigny d'engraziar a sia posiziun al spartavies per il Col de la Forclaz che maina vers Chamonix (Frantscha) ed il Grond Son Bernard che maina en la Val d'Aosta (Italia). Sin il Grond



Il Palaz da Stockalper a Brig.

Son Bernard ha son Bernard d'Aosta fundà enturn la mesadad dal 11avel tschientaner in ospizi che vegn tgirà dapi il 12avel tschientaner da canonis augustins. En il sidost da Martigny sa chatta plinavant Verbier, in ulteriur lieu da turissem enconuscent.

Da Martigny fin al Lai da Geneva

Suenter Martigny, sin l'autezza dals Dents du Midi (a sanestra) e dal Dent de Morcles (a dretga) passan ins tras l'uschenunada porta dal Vallais. Il Rodan mida qua andetgmain direziun e na curra betg pli vers sidvest, mabain vers nordvest fin ch'el sbucca en il Lai da Geneva.

En questa part inferiura da la Val dal Rodan tutga la spunda dretga gia tar il chantun Vad. Da la vart sanestra da la val giascha St-Maurice cun l'enconuscenta abazia che vala sco ina da las pli veglias da l'entir Occident. Il proxim lieu pli grond è Monthey; da là maina la via en direziun da St-Gingolph che giascha al Lai da Geneva al cunfin cun la Frantscha.

Natira

Il Vallais reunoscha sin ses territori ina ritgezza immensa da furmas climaticas, geograficas, e biologicas. Per exempel la flora: En il Vallais chattan ins passa 2000 plantas cun flur – e bunamain 100 da quellas na creschan nagliur auter en Svizra. Sch'ins traversa questa diversitad enorma che sa chatta sin differents stgallims e che sa dera sin bunamain 3000 meters d'autezza, è quai il medem sco in viadi davent da la riva da la Mar Mediterrana fin al circol polar.

Istorgia

L'onn 57 a.C. è il Vallais odiern – che vegniva numnà dals Romans Vallis Poenina – vegni integrà en l'Imperi roman. Grazia al Grond Son Bernard ha la part inferiura da la vallada giudi in temp da fluriziun. Suenter il declin da l'Imperi roman è il Vallais vegni integrà l'onn 888 en l'Imperi burgognais. L'onn 999 ha retg Rudolf III surdà il contadi cun tut ses dretgs e privilegis a l'uestg da Sion. Il temp medieval è medemamain stà marcà dals alemans ch'eran emigrads nà da la Part Sura Bernaisa en la part centrala e superiura dal Vallais (a partir da ca. 800) e da l'emigraziun dals Gualsers or da la part superiura dal chantun dad oz (12avel fin 14avel tschientaner).

Politicamain è l'ulteriur svilup stà dominà dal squitsch da vart dal ducadi da Savoia en la part inferiura dal Vallais e dal cumbat per la libertad en las parts centralas e superiuras da la vallada. A partir da la segunda mesadad dal 15avel tschientaner era il Vallais sutdividi en set uschenunads «Zehnden» (franzos «dizain»). En spezial en la part superiura dal Vallais ha il patriziat fatg valair en il decurs dal 16avel tschientaner sias libertads envers l'uestg. Il 1477 ha la Republica conquistà la part inferiura dal Vallais ed amministrà quella fin il 1798 sco terra subdita.

Suenter la conquista tras las truppas revoluziunaras franzosas ha Napoleon declerà il Vallais sco atgna republica (1802). Il 1810 è la regiun vegnida integrada sco Département du Simplon en la Frantscha. Suenter la retratga dals Franzos è il Vallais daventà il 1815 il 22avel chantun da la Svizra.

La vopna dal Vallais

Il Vallais sa cumpona da 13 districts (resp. 14 cun Raron Vest e Raron Ost). Quels èn sa sviluppads dals 13 «Zehnden» represchentads sin la vopna chantunala tras 13 stailas. Las colurs e las stailas da la vopna chantunala sa basan sin la vopna che retg Rudolf III aveva attribui l'onn 999 a la diocesa da Sion. Il dumber da las stailas e lur repartiziun ha dentant adina puspè varià. Pir en il decurs dal 18avel tschientaner è lur dumber vegni collià cun la subdivisiun territoriala: ils 7 vegls «Zehnden» (fin il 1798) ed il 6 ulteriurs ch'èn sa furmads fin il 1815 or da las anteriuras terras subditas.

Cultura

Culturalmain è il Vallais enconuscent – sper il carnaval dal Lötschental menziunà survat – sco il pajais dals cumbats da las pugnieras. Ultra da sia robustadad corporala sa proflescha la vatga dal raz Eringer tras sia cumbattivitad. A chaschun dals cumbats da vatgas sin las alps durant la stad determinescha la scossa sia vatga pugniera. Dapi ils onns 1920 vegnan er organisads cumbats da vatgas en la planira dal Vallais. Il fenomen dal

cumbat da vatgas è daventà l'essenza dal Vallais stget e tipic. «Le Vallais tout entier est dans la race d'Hérens», ha scrit l'autur Maurice Chappaz (1916-2009).

Lingua ed identitad

I dat er ina diversitad culturala en il Vallais. En emprima lingua naturalmain pervia da las duas linguas – il franzos ed il tudestg – che vivan ina sper l'autra e pervia dals numerus dialects. Il patua dal Vallais francofon è ina varietad linguistica che vegn quasi mo discurreda. Ella tutga tar la gronda famiglia dal francoprovenzal. Sias expressiuns èn per part uschè differentas, ch'ins ha mintgatant difficultads da sa chapir d'in lieu a l'auter.

Las differenzas entaifer il Vallais pon esser grondas, ma chaschun che las Vallesanas ed ils Vallesans han ina colliaziun tant pli stretga cun lur Chantun. Per ellas e per els è il Vallais in vair pajais dals origins, cun il Rodan sco gnerv vital che furma lur identitad.

Industria e tecnologia

Dapi intgins decennis è la diversitad impressiunanta dal Vallais vegnida enritgida tras in'ulteriura fassetta. Ina nova cuntrada – tecnologica – è vegnida vitiers. En il center da questas stentas da concepir il Vallais per las sfidas economicas da damaun statan trais secturs: la biotecnologia, la tecnologia d'infurmaziun e da comunicaziun sco er il sector da servetschs, cunzunt il turissem e la produziun d'energia. En la Val dal Rodan è vegnids stgaffids numerus centers da competenza e la planira da la val para oz in parc tecnologic gigantic.

Turissem

Tras sia cuntrada naturala en il center dal massiv imposant da las Alps e tras in clima miaivel (p.ex. a Crans-Montana dati passa 2000 uras sulegl per onn) è il Vallais ina da las destinaziuns turisticas preferidas da la Svizra (16 milliuns pernottaziuns ad onn). En ils lieux turistics da renum mundial sco Zermatt, Leukerbad, Crans-Montana, Verbier u Saas Fee, ma er en ils numerus vitgets originars en las vals lateralas: il turissem è preschent en praticamain tut il Vallais.

Grazia ad in schlargiament da sia puschida ha il Vallais acquistà oz novas perspectives per il svilup turistic. Latiers tutgan las numerusas funtaunas termalas, la bellezza da las cuntradas, ina ritga tradiziun da spezialitads localas e las numerusas pussaivladads per far excursiuns tematicas, culturalas u istoricas.

La preschentaaziun:

Dossier «Chantun Vallais»

Dapli infurmaziuns:

chatta.ch/?hiid=1829
www.chattà.ch



Apricosers en la part inferiura da la Val dal Rodan.